

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

- प्रधानमंत्री नरेंद्र मोदी होरें नमीं दिल्ली च भारत टैक्स 2025 च हिस्सा लैता।
- राष्ट्रपति द्रौपदी मुर्मू हुंदी मौजूदगी च राष्ट्रपति भवन दे प्रांगन च अज्ज नमें तरीके राहें चेंज ऑफ गार्ड दा उद्घाटन समारोह आयोजित कीता गेआ।
- उपराज्यपाल मनोज सिन्हा होरें युवाएं गी आह्वान कीता ऐ जे ओहू राष्ट्र निर्माण च अपनी भागीदारी देन।
- ते मुख्मन्त्री उमर अब्दुल्ला होरें जम्मू जिले दे जनप्रतिनिधिएं कन्नै बजअ सोआं पैहले सलाह सूत्तर आहली बैठक कीती।

<><><><><><>

PM- Tex

प्रधानमंत्री नरेंद्र मोदी होरें अज्ज भारत टैक्स 2025 प्रदर्शनी च हिस्सा लैता ते लोकें गी संबोधित कीता। उनें आखेआ जे एहू आयोजन कपड़ा उद्योग कन्नै जुड़े दे हर लौहके बड़े लेई इक सनैहरी मौका ऐ अपनी समर्था गी सारे सामने रक्खने दा। मोदी होरें आखेआ जे इस आयोजन कन्नै ना शड़ा भारतीय सांस्कृतिएं दा दुनिया गी पता लगै करदा ऐ ते भारत दे कपड़ा उद्योग ते सांस्कृतिक बन-सबन्नता कन्नै दुनिया वाकफ होआ करदी ऐ, सगुआं सब्बे 120 मुख्ब जेड़े इस प्रदर्शनी च हिस्सा लै करदे न, उनेंगी बी अपनी समर्था, कला ते संस्कृति गी सब्बनें सामने रक्खने दा मौका थ्होआ ऐ। मोदी होरें आखेआ जे इस चाल्ली दे आयोजन दुनिया दे नीति निर्माताएं लेई इक मजबूत आधार न ते बैंकिंग खेत्तर गी बी कपड़ा खेत्तर दिएं औहदे कोला आसें-मेदें गी समझना लोड़चदा। उनें

आखेआ जे भारत दुनिया दा सब्बनें शा बड्डा कपडा निर्यातक ऐ ते इस खेत्तर च विदेशी निवेश च बी दूने कोला मता बाद्दा दिक्खने गी लब्बा ऐ।

<><><><><><>

Prez. Change of Guard

राश्ट्रपति द्रौपदी मुर्मू हुंदी मौजूदगी च राश्ट्रपति भवन दे आंगन च अज्ज नमें तरीके राहें चेंज ऑफ गार्ड दा उद्घाटन समारोह आयोजित कीता गेआ। एहू समारोह आम जनता लेई शनिवारें 22 फरवरी कोला खुल्लोग, जेदे च संगीत ते होरनें कार्यक्रम होंगन। इस नमें फारमेट च समारोह दौरान राश्ट्रपति हुंदे अंगरक्षकें सने ब्रास बैंड आसेआ सैन्य ड्रिल दा प्रदर्शन बी कीता जाग। आयोजन च शामिल होने लेई पास आनलाइन लैते जाई सकदे ना पता ऐ- visit.rashtrapatibhavan.gov.in

<><><><><><>

LG-NGO

गाइडेंस एंड करियर काउंसलिंग सेल्स फॉर यूथ डेवेलपमेंट नां दे इक गैर सरकारी संगठन नै अज्ज साम्बा जिले दे गुडा सलाथिया च अपना 6मां स्थापना दिवस मनाया जेदे च उपराज्यपाल मनोज सिन्हा होर मुख्ख परौहने हे। इस मौके एल.जी होरें उत्थे लाए गेदे स्टालें दा चक्कर लाया। संगठन दे संस्थापक वीर प्रताप सिंह सलाथिया होरें उन्दे कम्मै च सहयोग देने लेई जिला प्रशासन दा आभार प्रगट कीता। बच्चें इस मौके शानदार रंगारंग ते सांस्कृतिक कार्यक्रम बी पेश कीते। मनोज सिन्हा होरें इस संगठन कन्नै जुडे दे नौजवानें दे कम्मैं-कारवाइएँ ते जत्तें दी सराहना कीती ते होरनें नौजवानें गी बी इंदे शा प्रेरणा लेइयै देशै दे निर्माण ते विकास च सहयोग देने लेई आखेआ।

<><><><><><>

Karkhandar-Reasi

रिवायती दस्तकारी गी बढावा देने ते इसी बचाने दे मकसद कन्नै दस्तकारी ते हत्थखड्डी मैहकमे जम्मू आसेआ रियासी जिले च इक कारखन्दार केंद्र कायम करने लेई मंजूरी देई दिती गई ऐ। एहू गैं खत्म होआरदी दस्तकारी च नमें सिरेआ जान भरने लेई सरकार दी तरफा चलाई जा'रदी पैहलकदमियें दे इक हिस्से दे तौरा पर पुट्टी गई ऐ

जेदा मकसद कारीगरें गी जरूरी सिखलाई उपलब्ध करोआना, आर्थिक मदाद देना ते रिवायती कौशल गी बरकरार रखना ऐ। रियासी जिले च इस केंद्र च लक्कड़ उप्पर नक्काशी ते पशमीना बुनाई ज्नेही विशेष दस्तकारियें पर ध्यान केंद्रित कीता जाग तां जे कारीगरें गी अपने हुनर च बाढ़ा करने ते व्यापक आर्थिक मौके उपलब्ध करोआने लेई इक मंच थहोग। इस बारे स्थाड़े जिला संवाददाता कन्नै गल्ल करदे होई सिखलाई देने आहली इक महिला संगीता होरें आखेआ।

जिस्सलै के इस सिखलाई हासल करने आहले नै बी इस चाल्ली दे अपने विचार सांझे कीते।

<><><><><><>

CM-Pre budget

मुख्यमंत्री उमर अब्दुल्ला होरें अज्ज सिविल सचिवालय च जम्मू जिले थमां जनप्रतिनिधिएं कन्नै बजट कोला पैहले आहला सलाह सूत्तर कीता। इस बैठका च मंत्री सतीश शर्मा ते मुख सचिव अटल डुल्लू हुंदे अलावा होर कई सीनियर अफसर बी मजूद हे। इस मौके विधायकें ते जिला विकास काउंसल दे प्रतिनिधिएं मुख्यमंत्री हुंदे कन्नै अपने-अपने इलाके दिएं जरूरतें ते लोकें दिएं आसें ताहंगें दे बारै च दस्सेअ ते कई सुझाऽ बी दिते जे किस चाल्ली केहड़े-केहड़े इलाके च जमीनी जरूरतें दे साब्बै कार्य योजना तैयार कीतियां जाई सकदियां न ते बजट च इंदा कैसा प्रावधान रक्खेआ जाई सकदा ऐ। उनें दस्सेआ जे चुनां प्रचार दौरान हल्के दे लोकें किने-किने चीजें बक्खी ध्यान आकर्षित कीता हा। मुख्यमंत्री होरें आखेआ जे बजट कोला पैहले आहलियां बैठकां इस्सै करियै लोआइयां जा करदियां न जे बजट तैयार करदे होई लोकें दी आसें-ताहंगें गी ध्यानै च रक्खेआ जाई सकै।

<><><><><><>

CM-GDCT

गुर्जर देश चैरिटेबल ट्रस्ट जम्मू आसेआ मुख्यमंत्री उमर अब्दुल्ला हुंदे सम्मान च ट्रस्ट परिसर च साहिर लुधियानवी कल्चरल हाल च कार्यक्रम दा सरिस्ता कीता गेआ। इस मौके गोजरी दे सगोसार संस्कृति ते विरासत दा छलैपा पेश करने दे कन्नो-कन्नी इस समुदाय ते जबान दिएं उपलब्धिएं गी बी उजागर कीता गेआ। इस मौके पर विशेष परौहने दे तौरा पर मजूद मंत्री सतीश शर्मा होरें ट्रस्ट दे सीनियर मिम्बरें दी भूमिका दी सराहना कीती जिंदी मशक्कत कन्नै इस सम्मान समारोह दा कामयाब आयोजन मुमकिन होई सकेया। मानजोग परौहने दे रूपै च जलशक्ति मंत्री जावेद अहमद राणा होरें गुर्जर देश चैरिटेबल ट्रस्ट दे कम्मैं-कारवाइएं ते भलाई-बेहतरी दे

कार्जक्रमें दी सराहना बी कीती। उनें ट्रस्टिं गी आखेआ जे सरकार आसेआ उपलब्ध सहयोग दा पूरा-पूरा इस्तेमाल भलाई बेहतरी दे अपने कार्जक्रमें च करना।

<><><><><><>

Poonch-JK PDCL

पुंछ जिले च बिजली दे बकाया पेदे कराये दी वसूली लेई जम्मू-कश्मीर बिजली विकास निगम लिमिटेड नै समूलचे जिले च इक व्यापक जांच अभियान शुरू कीता ऐ। एक्सईएन आफताब अहमद हुंदी अगुवाई च शुरू कीती गेदी इस पैहल दा मकसद उनें उपभोक्ताएं दा पता लाइयै उंदी बिजली कट्टना ऐ जेड़े लम्में चिरै सवां बिजली दा कराया जमा नेई करा करदे। इस अभियान गी असरदार ढंगै नै तोड़ चाढ़ने लेई जिले दे बक्ख-बक्ख हिस्सें च जांच करने लेई 4 विशेष टीमें दा गठन कीते दा ऐ ते अजे तोड़ी 3 लक्ख रपे दे बकाए वसूल कीते गेदे न, 120 कनैक्शन बी कट्टे गेन। इस अभियान बारै जानकारी दिंदे होई असिस्टेंट इंजीनियर अभिनव डाबर होरे दस्सेआ।

<><><><><><>

DC-Udhampur

उधमपुर दियां डिप्टी कमीशनर सलोनी राय होरे एसएसपी ए.ए.नागपुरे हुंदे कन्नै इक बैठक लाइयै महा शिवरात्रि ते रमजान दी तैआरिं दा जायजा लैता। इस दरान सुरक्षा, पीने आला पानी, बिजली सप्लाई, मैडिकल, साफ सफाई ते यातायात प्रबंधन दी तैआरिं दी समीक्षा कीती गेई। डिप्टी कमीशनर होरे सुरक्षा सरिस्तें गी होर बी मजबूत करने, एंबुलेंसें दी तैनाती ते बिजन रूकावट दे सेवा उपलब्ध करोआने लेई गलाया। लोकें गी साफ सफाई बनाई रखने दी अपील कीती गेई ते अफसरें गी आखेआ गेआ जे ओह बजार च चीजें बस्तें दे भाएं पर तक्क रखन।

<><><><><><>

Criminal Laws

आधुनिक ते अज्जै कल्लै स्थाबै अपराधिक न्याह प्रणाली बारे जिला प्रशासन राजौरी आस्सेआ पुलस मैह्कमे कन्नै रलियै इक जागरूकता कार्यक्रम दा सरिस्ता कीता गेआ। इस दरान लोकें गी त्रै नमें अपराधिक कनूनें भारतीय

न्याह संहिता, भारतीय नागरिक सुरक्षा संहिता ते भारतीय साक्ष्य अधिनियम बारे जागरूक कीता गेआ। इनें त्रैनें कनूनें पराने कनूनें दी थाह लैती ऐ ते औपनितेशिक युग दे कनूनें थमां निजाद थ्होई ऐ। इंदा मकसद कनून सरबन्धी ढांचे गी मजबूत करना ऐ। राजौरी दे डिप्टी कमीशनर अभिशेक शर्मा होरें लोकें गी इस बारे जागरूक बनाने दी जरूरता पर जोर पाया। उनें तकनालोजी अधारित बदलाव बारे बी लोकें गी जागरूक करने लेई गलाया। जागरूकता कार्यक्रम सरकारी डिग्री कालेज थन्नामंडी ते डाक बंगला नौशेहरा च बी लाया गेआ।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 23 फरवरी गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 119मीं किश्त होग। कार्यक्रम च शामिल करने लेई लोक अपने बचार ते सुझाह 21 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग।

<><><><><><>

WPL

क्रिकेट च महिलाएं दे प्रीमियर लीग दा त्रीया मुकाबला अज्ज गुजरात ज्याईट्स ते यूपी वॉरियर्स बश्कार खेड्डेया जाग। मैच संझा साड्डे 7 बजे शुरू होग। गुजरात ज्याईट्स गी इस सीजन दी शुरूआत च गै बेंगलुरु खलाफ शिकस्त झल्लनी पेई ही। जिस्सलै के यूपी वॉरियर्स अज्जै दे इस मैच कन्नै अपने अभियान दी शुरूआत करग। उ’आं जंदी रातीं वडोदरा दे कोटाम्बी स्टेडियम च दिल्ली कैपिटल्स नै मुम्बई इंडियन्स गी 2 विकेटें कन्नै ह्वाई दित्ता ह।

<><><><><><>